

مُنِيَّةُ الْمُصَلِّي

MUNYATUL MUSOLLI

(Cita-Cita Orang Yang Bersembahyang)

08 PERMULAAN KEFARDHUAN SEMBAHYANG

Dan pada riwayat Jabir رضي الله عنه dan Muaz رضي الله عنه, tatkala dinaikkan Rasulullah ﷺ ke langit (Mi'raj), melihat ia pada langit dunia malaikat berdiri selama-lamanya dijadikan Allah akan mereka itu menyebut zikir akan dia tiada ruku', dan pada langit yang kedua ruku' selama-lamanya tiada mereka itu mengangkat kepalanya, dan pada langit yang ketiganya sujud akan Allah tiada mengangkat kepalanya, melainkan ketika memberi salam Rasulullah ﷺ akan mereka itu. Maka diangkat kepalanya kerana menjawab salam Rasulullah ﷺ. Kemudian maka sujud pula selama-lamanya. Maka kerana inilah, dituntut dua kali sujud pada tiap-tiap raka'at. Dan pada langit yang keempat, tasyahhud mereka itu selama-lamanya. Dan pada langit yang kelimanya mengucapkan tasbih dan berzikir mereka itu selama-lamanya. Dan pada langit yang keenam mengucapkan takbir mereka itu selama-lamanya. Dan pada langit yang ketujuh, malaikat mengucapkan: **"Ya Salam"** (يا سلام) masa dijadikan Allah akan mereka itu. Maka cita hati Rasulullah ﷺ dan ingin bahawa dijadikan baginya demikian segala ibadat malaikat yang di dalam langit itu baginya dan bagi umatnya. Maka telah mengetahui oleh Tuhannya yang **Al-Khallaq** (الخالق - Maha Menjadikan) **Al-'Alim** (العليم - Maha Mengetahui) akan cita NabiNya serta sudah diketahui pada azalnya. Dihimpunkan segala ibadat malaikat yang dalam tujuh petala langit itu di dalam dua raka'at sembahyang kerana memuliakan NabiNya dan umatnya.

Kata Muaz رضي الله عنه dan Jabir رضي الله عنه :

"Maka barangsiapa berdiri di dalam sembahyang, serta membesarkan dia (sembahyang), dan ditunaikan segala rukunnya, dan ruku', dan sujudnya, adalah baginya pahala malaikat tujuh petala langit dan barang yang di dalamnya, daripada segala kejadian Allah ﷻ."